

Manfred Zirkelbach

MaZi-Ned auszudenke

Dialektunterricht

Des wor ower e Moal e guet Noochricht. In onnere Schuele därf odr soll jetz widr so gebabld wern, wie onnere Kinner dr Schnobl gewochse is. Zeid worsch scho lang, däss onnere öwerschde Bildungsschdradeche sich o onnere Nochbern däre Schwobe on Gelbfüßler e Beischbiel genomme hömm, wäll die angeblich alles könne außer Hochdeutsch.

On vo jetz ob werd aach bei ons in Baiern un Frankn vo Mittenwald bis Öwerweißbebrhchönn (Die Betonung liegt auf rrhch) Dialekt gelernd off Deüfel on komm raüs.

Moendich, Fürmiddoch, 10.00 Uhr, Volksschule Schönau, 3. Klasse, Stundenplan Heimat- und Sachkunde, Dialektunterricht, Klassenlehrerin Rosemarie Bauer; „Wir wenden uns heute dem Schönauer Dialekt zu“. Kläusle: „Des heißd Schönauer Dialekt“. Heinerle: „Blödsinn, bei uns in Wallbich gidts kee Schönauer, des sinn Schöneär“. Fränzle: „Ihr seid doof, koä Schönauer on erschd rachd koä Schöneär, bei ons in Wäfed worn des zu Lawesdooch die Schönoier. Des hälsde doch im Kuupf ned aüs“: Rosemarie Bauer: „Ich vermute, wir haben jetzt ein kleines Problem“. Kläusle: „Ned klein, Frau Lehrerin, kloï muss des heiß“. Heinerle: „Schbinnsd du? Klee heisd des“. Fränzle: „Nee, kloä is richdich“.....on so weider on so ford.

Ich weis ned wie die Dialektschdonn vo die Rosemarie nu dadsächlich aüsgange is. In onnere Kinnerzeit jedenfalls hädde mir mir e gscheid Raaferei däre Wäfeder die Schönoier on däre Wallbicher die Schöneär scho aäusgedriewe. Wär ower entscheid heüdzedooch welcher Dialekt in däre Zukunft für die Schönaaeäoier Volksschuel maßgeblich is?

Ned auszudenke